

同
岑
集

同岑初集卷四

茗上沈宗圻圻生輯

語溪陳 量仲抒參

徐 行 周道

善哉行

飢虎在山藏怒不吼五采斑然望之如繡解一如迎斯步

如拜斯伏視爲騶虞引躬暱就解二歡笑幾何攫肩及脰

居不擇交莫不顛覆解三藹藹麟趾實惟德鄰道遠莫致

涕泗悲辛解四雞鶩在野甘與爲倫雌伏雖卑不與禍親

解五日入崦嵫詰朝東出闔門夜寢嚮晨起櫛解六

碣石篇

風雪浹旬讀巖三求泰山觀日記慨然有作

夜登泰岱觀日將起海嶼光華或朱或紫波濤照耀振
蕩不已日出反晦斂光若止久而明發丹霞如綺哀彼
下民未覩朝晷幸甚至哉歌以詠志

解一

浹旬雨雪扶桑

匿暉召我婦子相與闔扉猛獸深藏伏鳥相依肅肅鴻
雁觸寒南飛夙夜振翮無巢可棲幸甚至哉歌以詠志
解二方舟濟河風發行難洪濤雖險不沒釣竿竿垂于滄
魚游于齔雖未得魚誓不他蹈鵬搏蒼蒼道遠食稀六
月之久飛不知飢幸甚至哉歌以詠志

解三

張罟曠野期

在得虞士不求道徒隱何爲大禹之聖尙惜寸晷天無
停日河無停水跛不輟步久登于巔愚不輟志久稱聖

賢幸甚至哉歌以詠志

四解

燕歌行

邯鄲美人擁秦箏斷續鳴咽不成聲海雲飛盡秋月生
西風振葉烏鵲驚停箏累欬憶南征沐雨櫛風功未成
返駕無期依危旌僕夫相親如弟兄南國有女色傾城
喜共旅人相逢迎夫婿秉心樸且貞諒不邂逅移中情
越鳥寄書入趙城但言吉康慰熒熒懼妾憂思損華榮

大牆上蒿行

偶讀魏文牆蒿行聞子遽廡中生千里駒遂以
命篇牆蒿逼操凌植集中真堪壓卷自魏迄今
各操選政未嘗有歎賞之者出此一示子遽誰

爲伯樂太息久之

男兒志在四方跼蹐欲何爲
駕驚馬馬力與人差池日
行百里中道疲雖有長鞭策之難與騏驥共驅馳
世人蹙迫苟安惟茲君子憂以思思得騏驥任驅馳
東將淩軼海岱西超巴蜀而轢氏羌南歷桂林象郡
北當經趙魏朔方追風躡景如驚發龍驤去歲廋人獻紫騮號權奇君不謂良晝思渥注之產陳八簋不知其旨夕思大宛之駿搖搖載寢載起天亦鑒爾精思篤生騷駼初生之辰羣馬已不敢頡頏光儀照爛沫頰而汗赤雙目煌煌脰有雞距圖經載詳燕昭所致購自遐方豈及爾龍友出東廂我悲叢棘塞彼周行騁轡無途四顧惶惶羊

腸之阪鹽車低昂古謂困阨尙有隘路可往今途窮難
服箱宜善藏安得王路坦坦無陂無傾四隅同軌征徒
不驚命王良縱送安且輕千里之道須臾解鞍塵不及
起人不及觀小醜發旌旆揚駕我元戎修我封疆干戈
定朝明堂和鸞齊鳴音中宮商爰議封禪以遵舊章率
萬騎扈辟王雨停風弭馳康莊追隨八駿上答穹蒼息
駕停雲列侯行觴君若臣相樂康樂洋洋爲樂自有期
驥伏櫪終逢時天老其材待時而施

霜回先生是山園雜詠

有引

東柯石樵避寇入郡城于第北闢一園園爲葛
洪燒丹遺趾嘗鎮蛟于此留小池以通蜃氣旁

有郭璞井園東數武卽景純故宅也顏曰是山
俾入其中者忘其非東柯云爾

蓬萊一水碧煙籠洞壑天開曲徑通畫靜鄰家歸鶴馭
寒生井幕壓蛟宮新篁競出閒雲上芳草潛生細雨中
肖負東柯崖谷好石樵還是老漁翁

瓦礫荒園漫卜居春深煙雨荷鋤初伴人寒歲移鄰竹
老我天年傍野樗寄託一身離亂後播遷萬卷散亡餘
但教北海烽煙靖閉戶閒吟日晏如

春深小苑獨扶筇花外牆低見遠峰晉代亭臺原有待
故鄉山水似重逢避人不覺庭生草多病猶能手植松
閒隔風塵惟咫尺柴門時遣白雲封

香殘鐙暗鳴雁哀雲壓雪飛朔風迴夷歌動地振林木
漁火徹曉照石苔池冰初合波不起梅蕊尙含香自來
誰家少年無箇事五夜急管催金壘

落梅

冰骨羞同萬卉榮南枝落落別離輕臨風未散疑霜曉
滿地相思伴月明飛去好隨高士臥折來難見故人情
從今再晤知何日還向江城聽笛聲

過惟肖野霞村舍

市隱慚君林壑高輞川村舍向東臯年來食菊人如昨
客到烹蓴主不勞鐙照漁歸同野燒田空鶩落亂風濤
流離此會稱難得未許樽前歎二毛

和陳皇士懷友詩

彭澤招尋菊徑游淮南悲賦桂枝秋老成人散懷三益
跼蹐時危擬四愁病骨半蘇枚乘筆夢魂欲上李膺舟
眼前無奈江濤隔惟有臨風一唱酬

白社飛觴致足娛青門荷耒興偏孤已悲歲暮長蓬蘽
況復秋聲起荻蘆四海幸存歌鳳客十年同作釣魚徒
酒酣唱和驚風雨誰道林泉失壯圖

沈彥章

考叔

題像

鳳德而衰麟歌誰藉哀彼民斯我之多暇日送流雲悠
悠代謝空此琴樽黃農虞夏

其釣維何東海之濱其室維何西山之岑何其獨處豈
無素心美人往矣邈彼苓榛

維彼流泉日遠于源維今之俗不可以還吾有遐心彼
蒼者天塊焉停雲曷其慨然

日月之行寒暑之成霜雪之凝松柏之貞四序環流孰
虧其盈絃歌匡坐敬俟河清

和陶飲酒

我愛菊旃子一靜息眾喧沖虛受繁雜兀傲非頽偏湘
溪有斯人澄波漾秋山城郭亦何世坐使淳風還此真
足共飲穆穆貯琴言

洪流已浩浩白雲正英英煙巒積晦色禾黍空人情屋

漏下自知牆危高易傾仰視增歎息蟋蟀牀頭鳴一飽
正不易哀哉我民生

同公挹子蘧訪天行四兄

爲訪幽棲士緣谿得路長亂山浮遠翠一水泛新香古
樹低漁網輕煙籠藥房白雲常似此回首但蒼茫

郡歸懷鳳晨諸子

負郭泛清潏春風返故園小橋依柳岸曲水繞柴門鳥
宿花千樹人歸月一村如聞漁唱遠樽酒共誰論

不器社長投贈新什奉酬志感

舉國尊先達千秋寄一身牆東依隱處天際想真人投
分亦何晚受知如有神市廛鐙火近莫惜唱酬頻

秋感

吳宮花草晉衣冠
蕭瑟驚心欲話難
萬里雲山空極目
一天風雨獨憑欄
蘆汀雁落溪光合
松徑人歸樹影寒
莫恨生涯成底事
功名何似酒杯寬

哭徐勿齋先生

獵獵西風萬騎來
長江鐵鎖一時開
孤臣自爲天王死
遺事誰憑野史裁
春水白隄人載酒
秋原玄墓蜨飛灰
可憐絃管傷心地
常向青山起暮哀

止止齋菊集

九月十月晨風涼
千朵萬朵弄晴光
瀟瀟灑灑自眞色
磊磊落落含幽香
芬芳已見蕙蘭歇
爛漫更少芙蓉妝

問天厚薄在遲暮使我感激懷嚴霜

和贈帷孺董子

煙雨追隨一水濱
隱淪蹤跡似潛鱗
無端往事成飄梗
肯待秋風始憶尊
萬里敝裘難作客
十千沽酒莫留春
故園何處能容我
櫻筍西山正可人

志感

霸越西施力亡吳
范蠡功一時有句踐
兒女盡英雄

讀孔融傳

不少孟嘗客時傾
北海樽從來負心事
多出受恩人

釣隱

五柳門前一釣磯
好風良月莫相違
如今白首誰堪語

舉世人情厭布衣

金鏡

金心

詠懷

農圃未礙學孔胡謝不如先生歸五柳荷鋤還讀書榮
落晤冥理獨笑忘飢飭孤景足自勸素心與之俱安得
桃花泉緬想在黃虞五男雖不才梨栗聊且娛古今多
出處焉能一步趨

古法華寺次蘇長公韻同李惟肖賦

玉嵐宵篠珍龕界醴翠鬟淑剔清派松粒參差鬪古芬
晴雲洗空昶心快閱厂梯枝稱上方頗聽寒濤沸澎湃
礫原容突去荒荒棠實紅侵榭路隘青蓮喻法時散香

白雀聞經影不壞攜詩窮嶮嬴取嘲遮莫高山鳥驚怪
躡磴朝闕圓燈東西嶺昭嶠遲紫矚坡公來請維摩憑
游戲半滿垂金薤青鞵布韞爾何人吾則何爲囚世械
慙慙野馬逐飛光愜興徒勞劇爬疥奄忽白鳧化老翁
龍性不馴鸞翩鍛根機未了三荊因捧手寶王聽稱債

遙聽楊太常彈琴詩

新聲方滿地安有太常琴二操何人聽三鳴祇自欽蒼

茫故壘跡慘淡老僧心淮水湯湯去時來空外音賊渡河後

賜琴自
鳴者三

咫尺重華賜樓船負荷深南薰曾解愠北望益傷心儼
見頎然立猶疑便殿臨黔雷起白日風雨古城陰

一代焦勞在咨夔正五音宮聲遂不反角調獨傳心入

海襄何忍爲僧臣未瘖柱摧桐欲折其敢續他琴

先生正音

謂角調失傳特爲增補

箇是廣陵散欣聞猶至今人閒徒傾耳天下果何心絃
關隆替哀傷自淺深無絃真有意操縵豈知音

聞董若雨祝髮于靈巖感賦

五車猶未足方外問三車西國添高第南天失巨儒乍
聞悲喜集轉念信疑俱自顧頭顱直何爲遂不如
故是再來者因緣亦會時若非天反覆未免世推移念
本由忠激身隨以奮飛曾聞無數佛血性一男兒

山夜雁

同四
宵寒月黑往何方之子于征履肅霜北地到來音自短
南天祇去夢誰長山深水遠愁難度秋老途荒夜未央
六翩漸高聲漸杳奇雲絕頂起彷徨

海天蹤跡總蒼茫憶爾磬磬必斷腸何處飄零書信脫
誰家擬議弋羅將初聞隻叫疑奇影靜聽多聲想幾行
莫向溪頭飛肅肅有人小膽怯空房

菊名二喬者聞蔣芳斐有之以詩乞種

滿城難覓國香栽誰鎖嬋娟銅雀臺三徑可容排闥入
今年破賊爲奴來

吳尹平

孟權

雁字